

欲撼冰山總不難，

又

燎原忽見死灰燃，太息難過厄運年，兵變陳橋誰致此，師興牧野豈從然，魯戈終覺能回日，妖霧何因欲蔽天，一自河山民作主，帝京未必在幽燕，

又

政綱變亂恨如何，欲息兵戈只共和，忍使胡雲迷泰岱，力擊砥柱障黃河，權奸盜國思遷鼎，義士匡時且枕戈，半壁東南猶足恃，不關城社鼠狐多，

又

百孔千瘡總待醫，蝸蟻國事不勝悲，無端薊北烽煙起，又見滇南羽檄馳，滿地荏苒何日靖，蒼生霖雨幾時施，而今世界非秦漢，肯放民權不護持，

### 民七南部廣東政府成立而作此

鐵石

欲撼冰山勢豈難，義旗一舉萬民歡，梅開庾嶺天心轉，月照珠江衆目看，漢柱共擎存國脉，燕京獨據食人肝，不關天塹分南北，霖雨蒼生有謝安，

又

掩耳誰知欲盜鈴，欺天竟使起雷霆，那驚涿鹿迷妖霧，却喜南溟見景星，七省興師誅逆賊，九州馳檄拯生靈，共和面具毋庸假，定造邦家慶輯寧，

未飲黃龍誓不休，忍看積羽竟沉舟，縱教鐵騎嘶幽冀，定見樓船下益州，十萬貔貅皆俊傑，一場傀儡等蜉蝣，而今世界民權重，肯放奸雄盜國謀，

政綱一髮繫千鈞，優孟衣冠僞作真，賴有中流擊砥柱，却從寶筏渡迷津，諸侯八百同誅紂，田島千秋豈帝秦，莫恃金湯稱絕險，應知國本在吾民，

### 輓方南崗先生 民六作

鐵石

追思握手橫江日，倏忽於今兩度春，每讀遺詩徒想像，那知投網竟捐身，裹尸志遂應無恨，擊楫才難孰與倫，欲賦招魂何處是，韓江風雨倍傷神，

又

文旌曾記擁檣城，海國春秋一筆評，草檄但期誅漢賊，焚書偏恨陷秦坑，祇因欲作黃龍飲，無分同尋白馬盟，從此騎鯨滄海去，彼都人士共吞聲，

又

棲遲田島幾經春，爲問何因竟入秦，殉國固應甘就義，殺身不惜在成仁，潮鳴珠海應留恨，草秃匡山與結隣，寄語黃花諸烈士，同聲相應即斯人，

又

弊政難除恨不平，可憐愛國竟捐生，骨埋桂嶺雲長護，血濺珠江月不明，厓海縱教沉宋鼎，楚師尙可却秦兵，待看痛飲黃龍日，應爲先生奠一罍，

### 追悼程璧光先生 民八作

昏空妖霧將星沉，未滅蚩尤抱恨深，板蕩中原誰致此，淵淪厓海枉追尋，風鳴哀角紅塵滾，雲捲靈旗白晝陰，荼毒忠良家國禍，蒼生何以挽天心，

鯨鮪未斬命先終，孽海茫茫孰障東，救國那堪遭殺運，誓師直欲討梟雄，石填精衛珠江黑，血泣春鵬庾嶺紅，破碎金甌誰補葺，傷心遺像鑄青銅，

### 聞北京學生毆斃國賊而作 民八作

鐵石

竟忍神州付陸沉，可知罪孽積來深，權奸不死貽民害，盜賊同賊快衆心，國賴諸生將法護，天誅羣逆假人擒，試觀武穆墳前檜，終古薰蕕判到今，